

XIVⁿ Congrès de l'Associacion Internacionala d'Estudis Occitans

del 11 al 16 setembre 2023

Caras amigas e cars amics,

Nos fa gaug de vos anonciar que l'Institut de filologia romanica de la Ludwig-Maximilians-Universität (LMU) de Munic a l'onor d'organizar lo XIVⁿ Congrès de l'Associacion Internacionala d'Estudis Occitans en colaboracion amb las e los collègas de l'Universitat de Ratisbona.

Datas e luòc

Lo congrès se debanarà del diluns 11 de setembre al dissabte 16 de setembre de 2023 (Amassada generala de l'A.I.E.O. e clausura del congrès) e se tindrà dins los luòcs de la LMU, situats al 67 de l'Oettingenstraße, 80538 Munic. Es un edifici tot prèp de l'*Englischer Garten* ont, se fa bèl temps, se pòt faire de bèlas passejadas. Aquest edifici de mai alberguèt la Radio Free Europe fins a 1995. Dimege, 10 de setembre, serà organizada una pichona reception pre-collòqui dins aquest luòc meteís.

« L'occitan a l'encontre dels estudis romanics / L'occitan à la rencontre des études romanes »

Es lo segond còp qu'un congrès de l'A.I.E.O. se tindrà en Alemanha. Après Aquisgran en 2008, Munic a l'onor de recebre las e los congressistas. Es aquò que nos a incitats a soscar al ròtle que l'occitan – lenga, literatura, cultura – a jogat pel desenvolopament de las nòstras tradicions academicas. Friedrich Diez, que sa *Grammatik der romanischen Sprachen* (1836-1844) marquèt lo començament de la romanistica scientifica en Alemanha, èra pivelat per la literatura dels trobadors. Son viatge a Jena per encontrar Johann Wolfgang von Goethe fa testimòni de son idèa de trobar dins los poèmas medievals çò que los idealistas alemands sonavan la « Weltliteratur ». Goethe li aviá aconselhat de consultar los trabalhs de François Raynouard, que, per d'autres motius, èra pivelat el tanben pels tèxtes medievals dels trobadors. Sens intrar dins los detalhs que resultèron d'aquest encontre entre l'istòria literària e la filologia, o encara la lingüística, comprenèm pasmens qu'a l'origina de las nòstras disciplinas se pòt trobar lo pivelatge per l'Autre e la volença de descobrir l'Universal dins la diversitat istorica de las lengas, literaturas e culturas. Aquò nos sembla un punt de partença conveceire pel nòstre congrès.

Plan segur es pas lo passat sonque que pòt profechar d'aquest apròchi comparatista. Lo comparatisme permet tanben de mièlhs comprendre perqué la diversitat lingüística e, per consequent, culturala es un subjècte a l'encòp scientific e politic. Convidam doncas totas e totes a soscar sus las tensions, mas tanben sus las possibilitats que son ligadas a l'agach de l'Autre, a un apròchi scientific e intellectual per lo qual la diversitat fa partida integranta de la nòstra experiéncia umana.

Coma de costuma, lo tèma causit fa resson a l'interès de las cercaires e dels cercaires que trabalhan dins de domenis fòrça diferents mas que partejan lo meteís interès per la lenga e la cultura occitanas. Sètz doncas convidadas e convidats a prepausar de contribucions dins de domenis coma

- la literatura medievala
- la literatura modèrna e contemporanèa
- la lingüística sincronica e diacronica
- la sociolingüística e la dialectologia
- la didactica de las lengas

- la musicologia
- l'antropologia e la sociologia

Plan segur, d'autres contribucions pòràn èstre prepausadas dins la mesura que abòrdan un subjècte en ligam amb l'occitan, ais central e vertadièra clau de vòlta de nostre congrès.

Site web del congrès

Lo site web del congrès es accessible a l'adreça : <https://www.fr.aieo2023.romanistik.uni-muenchen.de/index.html>

Per mai d'informacions, vos convidam a anar sul site web que serà mes a jorn regularament.

Datas importantas

16 de decembre de 2022 : data-limit pel mandadís de resumits de proposicions de comunicacion.

31 de genièr de 2023 : notificacion d'acceptacion de las comunicacions.

1 de febrèr de 2023: dubertura de las inscripcions (còstas reduidas).

1 de mai de 2023: aplicacion de còstas d'inscripcion plenas.

Dins l'espèra de vos rencontrar l'annada venenta a Munic,

Daniela Müller, Tania Paciaroni, Maria Selig e Francisco Calvo del Olmo

Comitat d'organizacion, setembre 2022